

欽定字惠全書

孚惠全書卷四十八

截撥裕食二

乾隆八年正月十三日奉

上諭前據閩浙總督那蘇圖等奏稱閩省需用米穀懇請截留浙江漕米二十萬石運閩備用部議未曾准行在部臣待籌全局立議固屬允當但閩省產米無多轉輸不易那蘇圖為豫籌積貯起見恐一時豐歉不齊臨期難於部署復申前請著照所奏將浙江尾幫漕米截留十萬石運赴閩省以裨益緩急計漕臣奉到此旨之日正浙省尾幫到蘇之時查乾隆三年撥江廣之米運往閩省總兵陳倫炯曾將米石由長江換海舶出口海運直抵

閩省此番亦應就近由海運閩更為便捷該部即速行文漕運總督及江南督撫並崇明總兵張天駿知之

六月二十日奉

上諭河間天津地方今年雨澤愆期米價昂貴不得不速籌接濟之道查上年通倉存貯有口外採買備用之粟米著先撥十萬石運送天津其何以分貯平糶賑恤聽總督高斌酌量辦理可即傳諭倉場侍郎雇船運送並著坐糧廳恩特督運速赴天津至一應搬運之費照例開銷該部遵諭速行

七月初八日奉

上諭前因直隸天津河間等屬夏間被旱米價昂

貴朕特降諭旨令倉場總督撥通倉米十萬石分貯被旱各州縣以備平糶撫恤之用今據高斌奏稱被旱之地已經成災除先行酌量撫綏外現在查明分別賑卹照例於冬月開賑等語朕思開賑之後需米必多著倉場總督於通倉後粟各色米內再撥四十萬石於現撥十萬石運完之後即行接運務於八月內全數運津令總督高斌分發各處水次就近輓運接濟冬間賑恤該部遵諭速行

十九日奉

上諭漕運關係京師積貯原本便輕議截留但目前京倉尚屬充裕而各省倉儲正在需米孔亟偶爾變通尚屬可行著將乾隆甲子年江蘇安徽浙

江江西湖北湖南六省應運京漕糧各留十萬石
於本省再著江蘇浙江各將十萬石運往福建著
江西將十萬石運往廣東以備緩急之用此朕格
外之恩不得援以為例

九月初五日奉

上諭朕軫念民艱以米糧為民食根本是以各關
米稅驟行蠲免其餘貨物照例徵收至於外洋商
人有航海運米至內地者尤當格外加恩方副朕
懷遠之意上年九月間暹羅商人運米至閩朕曾
降旨免徵船貨稅銀聞今歲仍復帶米來閩貿易
似此源源而來其加恩之處自當著為定例著自
乾隆八年為始嗣後凡遇外洋貨船來閩粵等省

貿易帶來一萬石以上者著免其船貨稅銀十分之五帶米五萬石以上者免其船貨稅銀十分之三其米聽照市價公平發糶若民間米多不須糶買即著官為收買以補官社等倉或散給沿海各標營兵糧之用俾外洋商人得需實惠不致有糶賣之艱該部即行文該督撫將軍並宣諭該國王知之

十月十六日奉

上諭據直隸總督高斌奏稱天津河間等屬今年夏間被旱業已蒙恩賑恤第歉收之後米價尚屬昂貴聞奉天米穀豐收請弛海禁俾商人販運米穀流通接濟天津等屬民食等語著照高斌所請

該部即行文該總督將軍府尹等知之

十七日奉

上諭奉天將軍額洛圖因朕恭謁

祖陵經行口外恐扈從人衆沿途米糧不敷供給
奏請巡幸之先禁止米糧入關今已回鑾自應開
禁通商第恐各處關口胥役人等仍或借端阻遏
希冀勒索以致米糧一時不能流通著該將軍府
尹等作速行文關口各員弁稽查胥役毋許借端
阻遏並出示曉諭關外商民聽其運往關內各處
販賣俾米糧流通民食充裕以副朕痼瘼民瘼之
至意

二十六日奉

上諭上年將山東截漕貯穀撥濟江南原屬移緩就急之計今歲夏秋之間山東濟南武定東昌三府屬偶被偏災曾撥運登萊穀八萬石以資賑濟嗣據奏各災屬補種之處及續報之臨邑縣復被霜侵收成歉薄又增賑糧目下賑給尚可敷用而來春借糶不可不豫為之計著將山東本年漕糧截留八萬石以豫備倉儲為災屬來春借糶之需該部即遵諭行

十一月初七日奉

上諭朕前降旨令江蘇安徽浙江江西湖北湖南等省各截漕糧十萬石存貯本省以備一時缺乏之用今聞湖南地方本年雨水調勻中晚二稻收

成豐稔民食有賴廣西今秋收成稍薄恐將來不
無需米之處湖南與廣西接壤一水可通若將截
留之漕米酌撥四萬石運往廣西以備明春糶濟
似為有益著該部即行文湖南廣西巡撫遵旨會
商速辦

十二月二十一日奉

上諭直隸天津河間等處今年被災業已加恩賑
恤第歉收之後米價頗昂來歲青黃不接之時民
食未免艱難所當豫為籌畫者除督臣高斌已遵
旨遣官在奉天買米八萬石外朕思明春山東河
南漕船經由直隸地方著截留漕米十萬石令高
斌視州縣大小酌量分派存貯以敷糶借之用於

民食自有裨益其如何截留東豫各船及分貯沿河州縣之處該督即會同倉場侍郎逐一詳悉妥議辦理

乾隆九年正月二十四日奉

上諭積貯民食所關從前各省倉儲務令足額原為地方偶有水旱得資接濟是以常平之外復許捐貯多方儲蓄無非為百姓計復因糴買太多市價日昂誠恐有妨民食因降旨暫停採買俾民間米穀自相流通價直平減亦無非為百姓計也乃近聞各省大吏竟以停止採買為省事州縣等官又多素畏積穀之累因而倉儲缺少不思常平之設不特以備荒歉即豐稔之年當青黃不接之時

亦得藉以平糶於民食甚有關係從前所降諭旨總在督撫大吏奉行之時將實在情形籌酌妥辦其間因時制宜原不可執一定之見今因有停止採買之令遂任倉穀缺少置之不理一處如此各處效尤將來必致糶借無資又似昔年倉穀有名無實如此因循固非設立常平本旨又詎朕停止採買之本意乎用是特頒諭旨曉諭各省督撫務須斟酌地方情形留心辦理應買則買應停則停總在相機籌畫不可膠執定見希圖省事以副朕軫念民食之至意

二月二十四日奉

上諭山東上年濟南東昌武定等屬之州縣被災

歉收朕已加恩賑濟毋使小民失所聞該省今春雖已得雨尚未霑足將來豐歉難以豫定應及時籌畫以備臨時之用目今東省牕內現有運京漕糧四萬餘石著就近截留以資借糶不敷之州縣再將北上糧船內截留漕米二十萬石分貯沿河臨清德州二倉倘遇需用之時即動撥接濟戶部即速行文倉場侍郎及山東巡撫遵諭速行妥辦

三月二十三日奉

上諭人君以養民為急務養民之道在使之上順天時下因地利殫其經營力作以贍其室家非沾沾於在上之補苴救恤遂長恃為資生之策也在昔善圖國是者謂以君養民則不足使民自養則

有餘誠不易之論國家歲轉漕粟以實京師乃備
天庾之出納關係最重或因偶遇災歉萬不得已
而為截留之計僅可問一行之豈遂視為常法今
內外臣工動以截漕為請朕念切民依亦屢次允
從出於一時之急濟其實京倉所貯雖云可備十
年要僅為官俸兵糧所必需若統為京師民人計
即一二年恐亦不足供支况欲更分此以賑貸直
省何末之思也漢文景間太倉之粟陳陳相因至
紅朽不可食彼時豈無一方之凶歉而未聞輕議
分減者誠以經國之大計務籌久遠在官在民於
內於外莫不各有本圖舍本圖而謀兼濟事多未
便勢且不能一有虧則兩俱損依古以來無取焉

上年各省倉儲需米孔亟朕因偶爾變通將江蘇
安徽浙江江西湖北湖南六省漕糧各留十萬石
於本省並著江蘇浙江各將米十萬石運往福建
江西將米十萬石運往廣東又因直隸天津河間
被災前後撥通倉米八十萬石備賑今年又令山
東截留二十萬石分貯接濟凡此皆因民命所關
不得不變通辦理小民不知各務生計而惟官糧
是賴無論官兵之外斷不能偏給窮黎即近漕之
處可以議截留其邊遠省分更無漕可截留又將
何以取給乎朕思一方之地利原可養一方之人
一家之人力原可養一家之人古者九職任萬民
一曰三農生九穀二曰園圃毓草木三曰虞衡作

山澤之材四曰數牧養蕃鳥獸何一非資生養贍之術為民父母民事即家事宜實心勸課隨時區畫使地無遺利民無遺力則家有蓋藏自可引養引恬俯仰不匱倘督撫不能督率有司有司復不以田里樹畜為事及數收之年但請給發倉糧截留漕米為督撫有司備賑之良策將使民間謂水旱可以不備不圖自食其力甚至游惰成風舉身家衣食之切務皆委之在官是非愛之實以害之矣天下之大億兆人民之衆惟正之供祇有此數焉得人人而濟之用是特降諭旨通諭直省督撫並飭守牧等官各思所督何事所撫何事所稱知府事知州知縣事實應知何事凡以為民計即所

以為身計既為民計而不使民知各為其身計其
能為民計者幾何繼自今督撫尚各體朕心毋忽
民事懇切開導並勸良有司務使百姓各知自謀
以裕生養之源不徒望恩幸澤而恩澤之加斯實
足以利濟則豐年樂其降康歉歲亦可恃無恐朕
願與諸臣共勉之

九月二十六日奉

上諭上年直隸天津河間等屬被旱歉收朕臨幸
奉天目睹收成豐稔米價平賤即降旨高斌令其
前往販運至次年秋收為止本年三月內又經御
史李清芳奏請寬限朕降旨寬限至今冬在案今
據高斌奏稱直屬米價雖現在平減而津屬慶雲

等縣現被偏災慶邑本屬少米之鄉天津又為商賈叢集之地可否仰懇聖恩准再將奉天海禁寬展一年俾民食得有接濟等語著照所請奉天海禁准再展一年該部即遵諭行

十二月初二日奉

上諭上年據鄂彌達晏斯盛奏稱湖北有待撥直隸米二十萬石現在存貯今年直隸已獲豐收無須接濟楚北年穀全登亦無需用之處惟浙江先後被水恐來歲青黃不接之際米價易騰應請將湖北現貯之米酌撥十萬石運赴浙省以備賑糶之需所糶之銀歸還楚省買補倉儲此外存貯米石如不需用即於來春糶抵倉儲等語鄂彌達等